

Քէրէկի նոյն ցրուած գաղութին պատմական կեանքի մասին դժբաղդարար ծանօթութիւն չունինք. բայց կ'երևի որ անոնց մէջ չէին պակսեր ուշիմ և բանիմաց հայեր: Ժէ. դարու առաջին քառորդին կամ կիսուն կը հանդիպինք Քէրէկցի վաճառականի մը՝ որ կ'ապրէր Նոր Զուղայի մէջ Գերաֆ աղա անուամբ: Յարութիւն Թ. Տէր Յովհաննանց իր Պատմութիւն Նոր Զուղայու որ յԱպրիլիան գործին մէջ (Ա. հատ. էջ 139-140) կը խօսի Գերաք Աղայի մասին և կ'ըսէ թէ ան Յակօր Աղայի որդին էր և վաճառականութեան մէջ երեւելի էր. առևտուրի զբաղում ունէր Եւրոպայի, Աստրախանի և Գելանի կողմերը: Գերաք Աղա երկու որդի ունեցաւ, մէկուն անունը Յակօր, որմէ ծնաւ Յովհաննան, որ Զուղայի հալածանքներու ժամանակ հեռացաւ և գնաց Սուրաթ, ուր վաճառականութեան ու ազգասիրութեան կողմէն նշանաւոր հանդիսացաւ: Գերաք Աղայի գործերու մասին լիուրի տեղեկութիւն չունինք. բայց ան՝ որովհետեւ Զուղայի Ս. Աստուածածին եկեղեցիին ժողովուրդներէն էր, նորոգել տուաւ նոյն եկեղեցին և ունի հոն յիշատակներ: Յիշատակութեան արժանի են այն երկու գեղարուեստական նկարները զոր վենետիկի մէջ նկարել տալով Ս. Աստուածածնի եկեղեցիին ընծայեց, և որոնք մինչեւ այժմ նոյն եկեղեցիին հիւսիսային և հարաւային պատերուն վրայ բեւեռուած են: Նոյն պատկերներուն համար հետեւեալ կերպով կ'արտայայտուի Յ. Տէր Յովհաննանց (անդ. Բ. հատ. էջ 196), Գերաք Աղա նոյն պատկերները վենետիկի մէջ ճարտար պատկերահանի մը ձեռքով կտաւի վրայ նկարել տուաւ պատին չափին ու յարմարութեան համաձայն, և բերաւ իրենց տեղերը գետեղեց գանձք: Հիւսիսային պատին պատկերն է Հերովդէսի պալատը և Ս. Յովհաննու գլխատումը: Նոյն պատկերին ներքեւ կը գտնուի պատկերը Գերաք Աղայի որ ձեռնամաձ աղօթքի կեցած է, և ձեռնամաձութեան մէջ գրուած է Գերաֆ: Հարաւային պատին պատկերն է Յիսուսի քառասնօրեայ գալուստն ի Տաճար, և անոր ներքեւը կը գտնուի Գերաք Աղայի կնոջ և անոր երկու զաւակներուն պատկերը: Ս. Աստուածածին եկեղեցիին վրայ իր կատարած նորոգութեան և այլ յիշատակներուն համար Գերաք Աղա յետ վախճանի նոյն եկեղեցիին հարաւային դրան առջեւ թաղուած է և տապանադիրն ալ հետեւեալն է.